

# *VA NA NTIYISO WA XIKWEMBU*



Kutani Yi hlayekisa xileswi.

*Kutani Elia, wa Tishbi, munhu... wa tiko ra Gilead, a ku ka Akab: YEHOVHA, Xikwembu xa Israel, loyi ndzi yimaka emahlweni ka yena, wa hanya! Malembe lawa ma nharhu ku ngaka ku ngavi na mpfula ni mberha, loko ku ngari hi rito ra mina.*

*Kutani rito ra YEHOVHA ri ya eka Elia ri ku:*

*Suka u famba etlhelo ra vuxa, u ya tumbela exinambyanini xa Kerit—Kerit, (ndzi khomeleni) lexi nge mahlweni ka Yordan.*

*U ta nwa mati ya xinambyana; ndzi lerisile mawukuwuku ku ku phamela kona...*

*Kava loko a famba, a endla hilaha YEHOVHA a n'wi byeleke ha kona: a ya tshama exinambyanini xa Kerit lexi nge mahlweni ka Yordan.*

*Kutani mawukuwuku ma n'wi tisela vuswa ni nyama ni mixo, ni vuswa ni nyama ni madyambu, a ri karhi a nwa mati ya xinambyana.*

*Loko ku hundze masiku, xinambyana xi phya, hikuva mpfula a yi nanga emisaveni.*

*Kutani YEHOVHA a ku ka Elia:*

*Pfuka, u ya Sarepta wa Sidon, u tshama kona: Waswivo, ndzi lerisile noni ku ku phamela kona:*

*Elia a suka a famba, a ya Sarepta.*

*Kute loko a fikile nyangweni wa muti, waswivo, noni a rhotela tihunyi kona; kutani a n'wi vita, a ku ka yena: Wa nga ndzi kela matinyana enkambanini ndzi nua.*

*Kaku loko a ha n'wi kelela, a n'wi vitana, a ku: Wa nga ndzi lavela ni xipandwana xa vuswa.*

*Yena a ku: YEHOVHA, Xikwembu xa wena, xa hanya! A ndzi na vuswa, ni byi ntsanana; ndzi ni xandla xa mapu ntsena embiteni, ni mafurha nyana exikhutwini, ndzi rhotela tihunyi timbirhi, ndzi muka, ndzi ya swekela n'wana nga na mina evuswanyana, kutani ku taku loko hi dyile, hi ta fa.*

*Elia a ku ka yena: U nga chavi! Muka u endla hilaha u nga vula ha kona; ntsena rhanga u ndzi swekela ximbhundhwana, u ndzi tisela xona ehandle, kutani u ya ti swekela, u swekela... ni n'wana wa wena.*

*Hikuva YEHOVHA, Xikwembu xa Israel, a ku: Mapa ma ngaka ma nga heri embiteni, ni mafurha exikhutwini, YEHOVHA a ko a nisa mpfula emisaveni.*

*Kutani wansati a famba a ya endla hilaha Elixa a n'wi byelete ha kona; hi masiku layo tala a dya, yena, ni yindlu ya yena, na Elia.*

*Mapa a ma helanga embiteni, ni mafurha a ma pfumariwanga xikhutwini, hilaha YEHOVHA a nga vula ha kona hi Elia.*

Eka ku vulavula ka mixo lowu, ntsena loko ndzi nga siya endzhandzheni wa malwandle, ndzi hlawurile tsalwa, ra ku: *Va na Ntiyiso Wa Xikwembu.*

<sup>2</sup> Kutani sweswi, Hosi, katekisa Rito ra Wena tani hiloko Ri ya emahlweni, nakona i ngaku Moya lowo Kwetsima wu nga ha khoma miehleketo ya hina na mianakanyo, u tlhela u hi lulamisela vuendzi bya Yena, tani hilaha hi N'wi kombeleke leswaku a ta. Hikuva a hi tanga endlwini ya Hosi leswaku hi ta voniwa, kumbe ku bona, kambe ku ta dyondza ha Wena, ni ku tiva ntumbuluko wa Wena, na ndlela ya Wena, na swivangelo swa Wena, leswaku hi nga ha kongomana na swiphiqho swa vutomi, na xitshembhiso xa xiviri, hi va ntiyiso wa Xikwembu. Hi nyike swona, Hosi. Hi Vito ra Yesu ha swikombela. Amen.

<sup>3</sup> Ku fanele kuri mixo wun'wana wo chavisa ngopfu. A ku hisa ngopfu ku tlhela ku va na ritshuri, nakona vanhu a vari exitarateni, va ri karhi va sika hi ndlala, nakona misava a yi hisa swinene a yi titulamiserile ku pfurha. Hinkwaswo leswi a swi ri xivonivoni xa vudyoho bya bona ni ku bola ka vumunhu bya bona.

<sup>4</sup> Ma swi bona, Akab a ri ekufumeni e—e Israel, hinkarhi walowo, kumbe ehenhleni ka Israel, nakona a ri hosi ley a yi bihe ngopfu eka tihosu hinkwato ta Israel. A kuri hava hosi ley a yi bihile tani hi Akab, hikuva yena, tani hilaha a dyondzisiwile ni ku tiva ku antswa, a nga tsandzekanga ku ya emahlweni kuva a nga xi tsakisi Xikwembu eka hinkwaswo leswi a swi endla. Hambi leswi a ri na mafambiselo lamanene ya swa tinyimpi, nakona vanhu a va va lava va humelela ehansi ka ku fuma ka yena, kambe, hambi swi ri tano, a wu nge swikoti kuva u nga xi tsakisi Xikwembu u tlhela u langutela kuva ekusuhi na xona nkarhi wo leha.

<sup>5</sup> Nakona, eka mucato wa yena, ematshan'wini yo teka exikarhini xa vanhu va ka bona, u humile a ya teka mudyohi, muphahli, mugandzeri wa mikwembu. U tekile Yezebel. Nakona a ngari mupfumeri.

<sup>6</sup> Nakona ku hava mupfumeri loyi a nga tekaka loyi a nga pfumeriki, ku hava ndlela yin'wana. Minkarhi hinkwayo u fanele ku teka lava va pfumelaka.

<sup>7</sup> Kambe Akab u endlile vubihi lebyi. Nakona a swi kanakanisi leswaku Yezebel a ri wansati wo saseka. Nakona u werile hi leswi a langutekisa xiswona, ematshan'wini ya leswi a ri xiswona. Sweswo swile ka vanhu votala, va endla swihoxo swo kotisa sweswo, ku fikela namuntlha.

<sup>8</sup> Nakona u nghanisile ku gandzela mikwembu ya hava etikweni, exikarhini ka vanhu. Nakona vanhu, vaprista, na va vuli va rito va vona, va wela evuhlongeni bya ku fuma lokukulu ka xilaveko lexi.

<sup>9</sup> Nakona i xifananiso xin'we xa tiko ra hina namuntlha. Hi wela ehansi ka xilaveko lexi xi nga duma. A swi kanakanisi leswaku vaprista a va ehleketa leswaku swikahle, ntsena loko mfumo wa vona wa ha swipfumelela. Kambe a ndzi na mhaka ni leswaku mfumo wa swipfumelela, swi fanele kuya hi ku pfumeleriwa hi Xikwembu. Nakona vanhu a va ehleketa leswaku swi tava swi ri kahle kuva va nghanenelela eka swin'wana swa swilo swa vona swa misava.

<sup>10</sup> Nakona un'wana a nga ha ndzi kombela ku tlhela ndzi kambisia leswi ndza ha ku swi vulaka, xexo i xifaniso lexi xi nga tolloveleka xa namuntlha. Swi nga endleka hi nga swi ehleketa leswaku hi va gandzeri va mikwembu, kambe hi ri vona. Nakona mfumo wa swi pfumelela. Vanhu namuntlha i va phahli va mikwembu, hikuva va—va gandzela swifaniso swa mikwembu. Van'wana va vona va gandzela vatlangi va tifilimi, leswaku i mikwembu ya vona. Van'wana va gandzela mali, leswaku i mikwembu ya vona. Kutani van'wana va gandzela vatlangi va tithelevhixini, tani hi mikwembu ya vona. Kambe hinkwaswo leswi u swi vekaka emahlweni ka Xikwembu swi va mikwembu ya wena, ku nga hava yini kumbe yini.

<sup>11</sup> Hambi kuri Sathana, nala wa hina lonkulu, hi un'wana wo tlhariha, ku fikela laha a vekelaka, minkarhi yin'wana, kereke emahlweni ka Xikwembu. U nga hava na kereke ya kahle ngopfu. Yi nga hava na muaki wa kahle swinene, kumbe yi nga hava dinominexini ya kahle ngopfu. Nakona, nakambe, yi nga hava na nhlengeletano ya kahle swinene, kambe u nga pfumeleli nchumu wu ta emahlweni ka Xikwembu, embilwini ya wena. Xin'wana na xin'wana, nakona lexi xivaka emahlweni ka Xikwembu, i xikwembu xa hava.

<sup>12</sup> Nakona vanhu lava a va switiva leswaku a va nga ha ri vaximoya tani hilaha a va tollovele kuva xiswona, ehansi ka kufuma ka tihosu tin'wana. Nakona va ehleketa leswaku, ntsena loko va nge siva tiko leri ri khongelaka, leswaku hinkwaswo swi tava kahle. Nakona ya leyo hi yona ndlela ya kuva hi ta eka ndhawu ya leyo na yona.

<sup>13</sup> Eka tinhweti tin'wana leti ti nga hundza a ndzi ri karhi ndzi vulavula na munghana wa mina wa kahle. Kutani u teri, "Makwerhu Branham, ndzi pfumela leswaku u haka United

States leri u ri yisa ehansi ngopfu.” A ku, “Minkarhi hi nkwayo u le ku bongeleni ka vudyoho ni hilaha Xikwembu xi nga ta xupula tiko leri hakona.”

<sup>14</sup> Ndzi ku, “Xi ya eku swi endleni, leswaku xi va lexi xi nga lulama.”

A ku, “Kambe, Makwerhu Branham, wa rivala leswaku tiko leri ri sunguriwile ehenhla ka Matsalwa. Nakona vakokwa-kokwa wa hina va tile lahayani, nakona Xikwembu xi hi nyikile ndzhaka leyi. Nakona hi tiko leri ri khongelaka.”

<sup>15</sup> Ndzi ku, “Walowo i ntiyiso, hinkawo ka wona. Nakona ku hava loyi a switivaka leswaku ndzi ri amukela njhani tiko leri! Kambe, languta, makwerhu wa mina, Israel na rona a ri hlawuriwile hi Xikwembu, nakona Xi rhumerile vaprofeta va rona na vavanuna lavakulu. Kambe Xikwembu xi ngaka xi nga byi yimeli vudyoho. Xi endlile leswaku Israel ri tshovela ndoho yin’wana na yin’wana leyi ri nga yi byala. Nakona loko Xi tava xi endlile Israel leswaku ri tshovela leswi ri nga swi byala, Xi ta hi endla hi tshovela leswi hi nga swi byala. A xi kali Xi xixima munhu.”

<sup>16</sup> Nakona hi fike endhawini leyi hi ehleketa leswaku hi wisele ehenhleni ka yona ehenhleni ka leswi vakokwa-kokwa wa hina va swi endleke, kumbe ehenhleni ka vasunguli va hina va kahle va tikereke, laha gandzelo ra kahle ra vona a ri ri eka Xikwembu, laha swi nga kahle ni kuva swi amukeleka ngopfu, kambe a hi nge swikoti ku humesa ku ponisiwa eka leswi va swi endleke! Ku ponisiwa i timhaka ta munhu a ri yexe exikarhi ka munhu na Xikwembu. Ku ngari ehenhleni ka tiko, na kereke ya hina, kambe kuri hina emahlweni ka Xikwembu, hi tihlamulela.

<sup>17</sup> Swi fikile endhawini etikweni ra hina, ku fikela exikarhini ka vanhu lava va nga va ximoya ngopfu hakanyingi lava hi nga na vona, loko u ya eka vavanuna va ximoya na vavasati, nakona u kuma leswaku etimbilwini ta vona ku na leswi swi kayivelaka.

<sup>18</sup> A hi ri eka swona, eka mavhiki mantsongo yo hetelela lawa ya nga hundza, a ndzi ri karhi ndzi ya eka swin’wana swa swilo leswi, nakona u kuma leswaku eka vavanuna lava a ndzi ehleketa leswaku va mbewu, hambi swi ri tano ndzi kume leswaku va veka ku tiyisisa ehenhleni ka swilo swa xinkadyana, va rhendzeleka va vula leswaku, “Xikwembu xi ndzi nyikile swo karhi leswikulu. Xikwembu xi ndzi nyikile . . .” Mi le ku huhuleni.

<sup>19</sup> Swilo swa xinhundzu swa kahle a swi wiseli eka ku rhandza ka Xikwembu minkarhi hinkwayo. Xikwembu xi endla mpfula leswaku yi nela eka lowo lulama na loyi a nga lulamangiki. Kambe leswi misava yi swi lavaka namuntlha a hi ku xisiwa hi ripfumelo, ku ringeta ku tixisetela hi swin’wana u tlhela u swi vitana swa ximoya.

<sup>20</sup> Nkarhi wun'wana ripfumelo ri nga endla mahlori ya kahle, nakona hambi swi ri tano ma nga humi eka mbilu ya ximoya. Xana a yi vulanga Hosi ya hina yi ku? "Votala va tata eka Mina, hi siku lero, va ku, 'Xana a ndzi endlanga *leswi* na *sweswo* xana, hi Vito ra Wena xana?" Nakona ndzi ta va byela leswaku, 'Sukani eka Mina, n'wina vatirhi va leswo biha.'" Xana vubihi i yini? Hi swin'wana *leswi* u swi tivaka ku swi endla swa kahle kutani u nga swi endli. "A Ndzi kalanga ndzi mi tiva," U ta vula tano. Nakona hi hanya eka siku lero.

<sup>21</sup> Leswi hi swi lavaka namuntlha a hi vunyingi bya swilo leswi swi khomelkaka. Hi na swona *sweswo*. A hi lavi tikereke letikulu. A hi lavi tinhlengeletano letikulu. A hi lavi swotala leswi swi humaka eka xiya ni moya nale ka thelevhixini. A hi lavi swilo swo tala swa swilo leswi. Kambe leswi hi swi lavaka namuntlha, i kuva va ximoya, i vanhu lava va nga ta titsongahata emahlweni ka Xikwembu, loko va ri hava na peni, kutani va ta khongela ku fikela laha moya lowu wu nga endzeni ka vona wu enela hi vukahile bya Xikwembu, nakona mpfxelelo wu teka ndhawu endzeni ka timbilu ta vona, *sweswo* swi ncinka matikhomele ya vona na moya lowu va hanyaka eka wona.

<sup>22</sup> U nga hava u ri hava pherhe ya swa le milengeni eminkondzweni ya wena, u nga hava u ambarile malapi, kambe swin'wana *leswi* swi nga embilwni ya wena swi yimbelela risuna ra Xikwembu. Swi nga antswa ndzi va na swona ku tlula mali hinkwayo leyi nga misaveni.

<sup>23</sup> Swingaleswi a wu nge vuli leswaku swilo *sweswo* swa ntumbuluko minkarhi hinkwayo i sayini ya minkateko ya Xikwembu. Davida u vulavule hi *sweswo* eka Hosi, leswaku u vonile lowo biha a tshambhuluta a...tani hi nsinya lowukulu wa *bay*. Kambe Xikwembu xi n'wi vutisile leswaku, "Xana u kale u n'wi tekela enhlokweni emakumu xana?" A swi na mhaka ni leswaku hi ambala swiambalo swa kahle ku fika kwihi, swi tarise ku yini *leswi* hi nga swidyaka, *sweswo* hi *leswi* swi nga yiki Emahlweni ka Xikwembu. Miri lowu hi tshamaka endzeni ka wona, wa lova, swi ngari na mhaka ni leswaku hi wu hlaysia njhani. Kambe i moya lowu wu nga endzeni ka munhu; i xiymo xa moya lowu wu yaka eVukoneni bya Xikwembu lexi xi hanyaka.

<sup>24</sup> Kambe hi tekela swilo ehansi. Hi ehleketa leswaku hikuva ntsena hi tiko... A swi ri tano nale ka Akab na Israel hinkwaro, hi siku lero, a va tekele swilo ehansi, leswaku hinkwaswo a swi ri kahle. Vaprista va vona na vachumayeri va ringetile ku va byela leswaku, "Hinkwaswo swi tshamisekile. Hinkwaswo swi kahle." Kambe a vari na un'we, u huwelele ku lwisana na nchumu wo hoxeka, hikuva loyi a switiva leswaku Xikwembu xexo xo kwetsima xi ngaka xi nga enetisiwi hi mangoti ya ximanguva lawa ya vukhongeri lebyi byi nga kwetsimiki.

<sup>25</sup> Swi tano na Xikwembu xa Tilo xa hari xexiya na namunthla. Eka matshalatshala hinkwawo na swilo leswikulu leswi hi ringetaka ku swi endla, Xikwembu xi ngaka xi nga tsakisiwi hi le handle ka vutomi bya khale lebyi byi nga kwetsimisiwa emahlweni ka Xona.

<sup>26</sup> Hi nga ha a ka swikolo, na switempelani, na titabernakele. Hi nga hava na mihlangano. Hi nga ha endla swilo leswikulu, kambe hambi swi ri tano Xikwembu xi ngaka xi nga enetisiwi ku fikela laha moyo wa munhu wu va ka lowu wu nga kwetsimisiwa eka altari ya Xikwembu, wu nyikela ku tirha mintirho ya Xikwembu. Nakona a wa ha swi kumi sweswo nakambe.

<sup>27</sup> U kuma tinhlengeletano ta hina ta swikhongelo ti tsanile swinene, kova ntsena xikhongelo xa kwalomu ka minete, munhu a tlulela a mubedweni. Hi kuma leswaku sweswo swi humelela kwalomu ka ku ringana kan'we kumbe ka mbirhi hi siku. Loko, hinkwerhu ka hina hi ri na nandzu. Tiko ra hina, hi vunene, ri le ku boleni. Hi vile na vo Billy Grahams na vo Oral Roberts hinkwako. Kambe ku fikela laha ku taka torha embilwini ya Amerika, ku ri tisa nakambe eka Xikwembu lexi xi hanyaka nakambe, ku ya eka ntokoto lowu wu hanyaka, ku ya eka ripfumelo leri ri nga feki eka Xikwembu lexi xi hanyaka. Ho va ntsena eku beni ka mabyongo ya hina, tani hilaha swi nga vulaka, swi swi humesa.

<sup>28</sup> Hi nga ha famba hi humeseli swifuva ehandle, na tikholoro ta hina ti hundzulukeli endzhaku, kutani hi famba exitarateni, nakona hi ri na ku navela ku vitaniwa "Dokodela" kumbe "Mufundhisi." Hi nga ha risa tikereke letikulukumba leti ti nga kona etikweni, nakona hi nga hava tani hi va rikhongelo tani hilaha hi nga va ka xiswona, laha ku nga ta pfumaleka na munhu na un'we loyi a nga ta vekela rintihi eka vutomi bya hina. Kambe kufikela laha moyo lowu wu nga endzeni ka hina wu nga endzilweni hikwalaho ka Xikwembu, ku fikela swin'wana leswi swi nga kona, leswi swi nga na ku navela loku ku enteke eka Xona! "Tani hi mhunti loko yi navela mati ya xinambyana, moyo wa nga wu na torha ra Wena, Wena Xikwembu." Ku fikela laha hi kumaka ntokoto wa muxaka walowo!

<sup>29</sup> Swingaleswi, xikhomonisi, na kuya emahlweni, xi ta vuyeriwa hi misava tani hilaha va swi endlaka, na hinkwako ku joyina loko hi ku endlaka ku ngaka ku nga ku yimisi. Swi bvumbhiwile leswaku swi ta ta. Kambe Xikwembu xi le ku vitaneni ka Kereke ya Xona.

<sup>30</sup> Hilaha wansati loyi lontsongo a ri murhoteli wa tihunyi ta Elia hakona! Hukuva, hi ntolovelu swendlo swa wena swi kombisa leswi u nga xiswona. Nakona, nakambe, a hlawuriwile ku ta tsakisa muprofeta wa Xikwembu. Tsundzukani, a ri wa Matiko, a ngari Muyuda.

<sup>31</sup> Kutani tiko a ri ri eku pfurheni. Nakona a swi kanakanisi leswaku wansati loyi lontsongo, kuva a ri murhoteli wa tihunyi teto, kuva a ri xifananiso xa mupfumeri... Hikuva ha swivona leswaku Xikwembu a xi tava xi nga n'wi vitananga, loko a nga ringanelanga kuva a tsakisa mupprofeta wa Xikwembu. Hikuva a Xi tava xi nga n'wi rhumelanga mupprofeta wa Xona eka yindlu leyi yi nga fanelangiki.

<sup>32</sup> A ku ngari hi ku hlawula ka yena. A kuri hi ku hlawula ka Xikwembu. A ku ngari yena loyi a nga ti kombela. A kuri Xikwembu lexi xi nga n'wi kombela. A vekiwile exinambyanini. Mawukuwuku a ya n'wi phamela kona. Kambe a kuri ku lerisa ka Xikwembu eka swin'wana leswaku swi teka ndhawu. Nakona Xikwembu hakunene xi yile eka mupfumeri loyi a ri na ntumbuluko wun've na Elia.

<sup>33</sup> A ri wansati wa noni. Nakona hinkwerhu ha switiva hilaha a ri xiswona, wansati wa noni, a tava a yile emahlweni, na nuna wa yena loyi a nga fa na jaha leri ntsongo kuva va ri kurisa.

<sup>34</sup> Nakona eka misava leyi yi nga kwalahaya, a va tshembhele eka swirimiwa. A va ngari na tiprojete tani hilaha hi nga na tona namuntlha, na—na swimilana swa vutisrheleri. A va tshembhele eka swirimiwa swa vona. Nakona hikokwalaho ka vubihi bya vanhu, na ku bola ka vunene bya vona, swi tisile dyandza etikweni, lahawani a vari ekusikeni va tlhela va fa.

<sup>35</sup> Nakambe hi kuma leswaku a swi kanakanisi leswaku u khongele vusiku byin'wana na byin'wana, vusiku hinkwabyo, loko a sungula ku vona mapa embiteni ya sungula ku vohla, ya vohla, ya vohla. Nakona ma nga hava ma fikile laha a ku nga ha ri na mapo yo tata khapu embiteni. Hinkwawo lawa a sale na wona a yari yo tata xandla. Rifu a ri fika a ri ri egedeni, enyangweni wa yena. Hikuva a ku nga ha ri na ndlela yo kuma man'wana nakambe. Tiko hinkwaro a ri ri ekusikeni.

<sup>36</sup> Kutani, mafurha, a ku lo sala ntsena yo tata lepula exikhutwini. Ntsena mafurha ya lawa na mapo ya lawa swi tshamile exikarhi ka rifu ra yena. A nga hava a tshembhekile ngopfu eka swikhongelo swa yena. Loko u nga pfumelela sweswo swi ba ekaya ra wena, swi tava leswi swi nga tshembheka nyana ku tlula leswi hi nga xiswona mixo lowu, loko hi switiva leswaku rifu ri etlele enyangweni.

<sup>37</sup> Nakona ndza pfumela, nkarhi wun'wana, hi nga ha ehleketa leswaku, leswaku nkarhi wun'wana, leswi, leswaku u khongele vusiku hinkwabyo, ku ringana siku rin've ntsena ra swi tshamisekisa. A nga ha languta na milomo yo pawuluka ya xijahetani xa yena xa kwalomu ka malembe manharhu kumbe mune hi vukhale. Nakona a nga ha kota ku vona marhambu ya yena lawa ya vunaka, tani hiloko nyama yi suka eka wona. Nakona a kuri nchumu lowu wu chavisaka ngopfu, tani hi manana loyi, loko a vona swilo leswi loko swi famba.

Nakona, hambi swi ri tano, na mavoko ya yena emahlweni ka Xikwembu, a ri eku khongeleni nhlikanhi na vusiku, “Sweswi hi vohlele hi mapa ku ya fika eka ku ta ta xandla xin’we na lepula leri ri nga tala hi mafurha.”

<sup>38</sup> Ma swi tiva, i nchumu lowu wu chavisaka. I nga ku Xikwembu xi nga swi pfumelela leswi swi nwelela eka un’wana na un’wana wa n’wina, loko mo tshuka mi nga ha ndzi twi ndzi chumayela nakambe. Mi nge leri ri va hungu. Swa chavisa, swi chavisa swinene, leswaku minkarhi yin’wana Xikwembu xexo xi endla swilo hi ndlela ya leyo.

<sup>39</sup> Ma swi tiva, loko hi tava hi tivurile swidyoho swa hina ni kuva hi hlangana na swilaveko hinkwaswo leswi Xikwembu xi swi lavaka...Hi pfumela eka Xikwembu. Ku na swiyimo leswi hi fanelaka ku hlangana na swona, nakona swi ri ku ya hi ku rhandza ka Xona. Nakona hi tivurile swidyoho swa hina, nakona hi endla swihoxo hinkwaswo leswi hi swi hoxeke leswaku, swi va leswi swi lulamisiwaka, hi endla hinkwaswo leswi hi tivaka ku swi endla. Swilaveko hinkwaswo leswi Xikwembu xi nga swi endla, kumbe ku swi kombela, hi hlanganile na swona swilaveko sweswo, nakona hambi swi ri tano Xi va xi timiyelerile. Ntsena Xi nga hi hlamuli.

<sup>40</sup> Ndzi na ntiyiso wa leswaku ndzi vulavula na vanhu, mixo lowu, lava va nga fika eka ndhawu ya leyo. A ndzi ri kwalahaya, minkarhi yo tala, hi vumina. Loko ndzi tava ndzi tlhelerile endzhaku ni ku lavisia vutomi bya mina ni kuva ni hundzuluxile ribye rin’wana na rin’wana, nakona ndzi kuma leswaku ndzi endlile swin’wana swo hoxeka, ndzi nga ha ya ndzi ya tivula ni ku, “Hosi Xikwembu, ndzi ta swilulamisa,” ndzi tlhela ndzi ya swi endla. Ndzi tlhela ndzi vuya nakambe ndzi ta ku, “Sweswi, Hosi, Wena u Xikwembu; U ta ndzi hlamula. Hakunene ndzi hlanganile na xilaveko xin’wana na xin’wana lexi Wena a wu xi lava ndzi xi endla. Nakona swilaveko hinkwaswo, ndzi hlanganile na swona.” Nakona hambi swi ri tano a Kitshukunyuki, swi tikomba xi tshamile xi timiyelela, kwalaho hilaha u fanelaka kuva na ntiyiso wa leswaku hi Xona Xikwembu. U nga hetiwi matimba. Nchumu wa kona, hi leswaku, embilwini ya wena, va na ntiyiso wa Xikwembu.

<sup>41</sup> Tsalwa ra mina. Va na ntiyiso, kusungula, u nga se endla nchumu. Va na ntiyiso, embilwini ya wena, wa leswaku i Xikwembu. Nakona loko u hlanganile na hinkwaswo leswi Xi nga swivula, nakona u ri na ntiyiso wa leswaku hi Xona Xikwembu, kwalaho hiloko ripfumelo ri ya eku tirheni, kona kwalahaya. Ripfumelo ri yima ri ku tsetserhe, hikuva ra switiva leswaku hi Xona.

<sup>42</sup> Nakona u hlangana na xilaveko xin’wana na xin’wana. U pfumela leswaku hi Xona, nakona ripfumelo ri yima ri ku

tsetserhe. Oho, a ku kateki Vito ra Xona! Ripfumelo ri ngaka ri nga tsekatseki, hikuva ri na ntiyiso wa leswaku Xikwembu xi tano, ni kuva muhakeri wa lava va Xi lavaka hi ntiyiso.

<sup>43</sup> I nga ku leswi swi nga nghenelela nakona swi nga suki eka n'wina, Branham Tabernacle. Loko mi tava mi hlanganile na swilaveko swa Xikwembu, nakona etimbilwini ta n'wina mi ri karhi mi pfumela leswaku hi Xona, ntsena Xikwembu xi le ku ringeten ka ripfumelo ra n'wina, hikuva Xi rhandza ku swi endla sweswo. Mi ti vurile swidyoho swa n'wina nakona mi hlanganile na swilaveko hinkwaswo leswi Xikwembu xi swi rhandzaka, nakona hambi swi ri tano Xi va xa ha timiyelerile, tsundzukani, ripfumelo ri vula leswaku hi Xona. Kutani ripfumelo ri khomelela eka swona, ri ngari ku swi tiveni hinkwaswo ka swona, kambe ra switiva leswaku hi Xona, nakona i ntiyiso lowu wu nga Xona.

<sup>44</sup> Kutani, tsundzukani, loko xi ri Xona, Marito ya Xona ya fanelia ku va ntiyiso. Nakona loko Xi milava leswaku mi hlangana na swilaveko leswi, nakona mi swi endlile, Xa boheka ku hlayisa Rito ra Xona. Mi nga tlheleli endzhaku, mi ku, "Kunene, a ndzi kalanga ndzi horisiwa. Ndzi..." Oho, wa ripfumelo ro tsana, ro siwaneka. Mi nga swi pfumeleli sweswo. Loko hi leswaku hinkwaswo swi vuriwile, nakona hinkwaswo swi humesiwile, nakona mi hlangana na xilaveko xa Xikwembu, ripfumelo ra khomelela kwalahaya. Ku hava lexi xi nga ri susaka. Xi tano, nakona mi ri na ntiyiso. "Lava va rindzelaka Hosi va ta kuma matimba lama ntshwa; va ta haha hi timpapa ta gama. Va ta tsutsuma va nga karhali; loko va famba, va ngaka va nga tsani."

<sup>45</sup> Yimani, loko mi hlangana na xilaveko xa Xona. Sweswo swi tisa ripfumelo ra n'wina eka ku kombisa. Loko mi hlanganile... Swilaveko swa Xikwembu swi endliwile, kumbe ku hlanganiwe na swona, nakona u swi lemukile hinkwaswo hi ku hetiseka, nakona mi endlile hinkwaswo leswi Xikwembu xi mi lavaka leswaku mi swi endla, kutani ripfumelo ra n'wina ri wisela kwalahaya, leswi Xi nga xi swona. Vanani ntiyiso wa Xikwembu.

<sup>46</sup> Ma swi tiva, Xi rhandza ku hi ringeta. Xi rhandza ku vona swendlo swa ripfumelo ra n'wina. Xana a mi switiva sweswo xana? Xikwembu xi tsakela ku mi vona leswaku mi endlisa ku yini. Loko mi ku, "Wena Hosi, ndza Ku pfumela. Hi Wena Muponisi wa mina. Ndza pfumela leswaku hi Wena Muhanysi. Ndzi pfumela leswaku hi Wena Un'wana Loyi a nyikaka Moya lowo Kwetsima. Na swilo leswi ndzi swi lavaka, U Xikwembu Lexi xi swi nyikaka sweswo." Kutani loko mi tivula swidyoho swa n'wina mi tlhela mi tshembhisa Xikwembu leswi mi nga ta swi endla loko Xi nga mi pfumelela leswaku mi hola, nakona hikwalaho ka kuva swi nga humeleli, mi tsutsuma mi suka ku kotisa toya kun'wana. Xikwembu xi ngaka xi nga swi

endli sweswo. Ku hava ndlela eka Xona yo mi tirhisa. Ku hava ndlela eka Xona yo mi hlamula, hikuva Xi hlamula ntsena hi ripfumelo. Kutani, xikan'we-kan'we, mi fambela ekule, nakona Xi ngaka xi nga hlamuli. Kambe hakunene, ripfumelo ra ntayiso ri yima kwalahaya, hikokwalaho ka ntayiso wa leswaku Xikwembu xi kona. Va na ntayiso wa leswaku Xi kona.

<sup>47</sup> Nakona loko Xikwembu xi kombela nchumu lowu leswaku wu endliwa, ku tivula vudyoho bya n'wina, na kuya emahlweni, nakona mi va mi swi endlile, ripfumelo ri vula leswaku Xi tano, hakunene wu ya eku humeeleni. Xikombelo xa wena xi fanele ku nyikiwa. Oho, ndza—ndza tshembha leswaku a mi swi hupi sweswo. Loko u ri na ntayiso wa Xikwembu, Xikwembu xi na ntayiso hi Rito ra Xona. Ntsena Xi rindzerile ku ku ringeta.

Xi swi endlile minkarhi yo tala. A hi pfuxeteni wun'we kumbe milandzu mimbirhi.

<sup>48</sup> A hi ehleketeni hi vana va Vaheveru. A va nga swilavi ku khinsamela xifaniso. Xikwembu a xi ri na ku tshembha eka vona. Nakona loko va twa leswaku va fanele ku ya ekheleni ra ndzilo, va teri, "Xikwembu xa hina xa swikota ku hi kutsula eka khele leri. Kambe loko Xi nga swi endlili, hi ngaka hi nga khinsameli na xin'we xa swifaniso swa wena." Wa vona, a va ri na ntayiso ni leswaku a va ri ntayiso wa Xikwembu hakunene.

<sup>49</sup> A va switiva leswaku a Xi ri Yehovha. A va switiva leswaku Xa hlamula xikhongelo. Kambe hambi Xi swi endlile eka nandzu wa vona, kumbe xi nga swi endlaka, a xi fanerile leswaku xi va lexa kahle. Swingaleswi ntsena va endlile switatimendhe, va tivula swidyoho swa vona, kutani va famba va nghena erifini.

<sup>50</sup> Loko va ha ya ekheleni ra ndzilo, va ri karhi va switiva leswaku va ntayiso, wa leswaku, loko Xikwembu xi nga va pfumelela leswaku vatshwa, Xi ta tlhela xi va pfuxa nakambe, eku pfukeni ka vafi. A vari ntayiso wa Xikwembu, hikuva a va switiva leswaku Xikwembu xi ta tirha hinkwaswo eka swa kahle swa vona. Nakona loko hi ri ntayiso wa Xikwembu, ha switiva leswaku Xikwembu xi tirha hinkwaswo leswaku swi va kahle eka hina.

<sup>51</sup> Swingaleswi, va endlile xitatimendhe xin'we. A vari ntayiso, nakona va fambile va kongoma ekheleni ra ndzilo. Nakona Xikwembu xi va pfumelela ku famba kwalahaya; va fika va tshama, va va languta. Xi lavile ku vona leswaku va endla yini.

<sup>52</sup> Loko, hosi yi teri, "Xana mi khinsamile loko mhalamhala yi chaya xana?"

Va teri, "Ee. A hi khinsamanga." Hi rero ripfumelo ra wena, u ri khoma ri tiya.

"Kunene, kutani, loko mi nga khinsamaka, mi tiva xileriso xa mina."

"Ina, ha xi tiva xileriso xa wena."

“Xileriso xa mina i xa leswaku khele lero ri ta hisiwa ka nkombo ku tlula hilaha ri nga tshama ri hisisiwa xiswona, nakona ndzi ta mi hoxa endzeni kwalahaya. Xana mi swi lava sweswi ku khinsama xana?”

“Ee. Hi ngaka hi nga khinsami.” Hi rero ripfumelo ra vona.

<sup>53</sup> Xikwembu xi teri, “Kunene, Ndzi ta swi vona leswaku va ta endla yini ha rona. Ndzi ta vona hilaha ripfumelo ra vona ri nga tava na maendlelo hakona.”

<sup>54</sup> Swingaleswi u teri, “Va boheni mavoko ya vona, mi va boha na milenge ya vona, kutani mi va yisa ekheleni lero.” Kutani va fambile ehenhla ka khele lero, na ndzilo lowu a wu ri eswikandzeni swa vona. Xikwembu a xa ha yimile, xi swi languta. Kambe a vari na ntiyiso wa leswaku a Xi ri Xikwembu. Va endlile ku tivula ka vona. Hinkwaswo a va swi lulamisile, leswi a va switiva. A vari na ntiyiso wa leswaku a Xi ri Xikwembu.

<sup>55</sup> Swingaleswi va fambile ehenhla ka khele lero ra ndzilo. Eka xinkadyana xo hetelela, kwalahaya Xi tile xi khandziyile xi huma ematilweni, eka golonyi ya moya, yi fika yi bela moya kusuka ku pfurha loku a kuri eka vona, loko Xa ha va miyeta timbilu ni ku vulavula na vona.

<sup>56</sup> Xikwembu xi pfumelerile ripfumelo ra n'wina leswaku ri fika exindhawanini lexi ri nga ta tirha.

<sup>57</sup> A kuri na Yobo, wa Testamente ya Khale, loko Sathana, muhehli wa hina, a n'wi hehlile hikuva a ri mudyozi loyi a tumbelelaka. Kambe Yobo a switiva leswaku a nga dyohanga. A switiva leswaku u tivule hinkwaswo leswi a nga swi endla, kutani a vekela gandzelo ro hisiwa lahay. Xexo a xi ri xilaveko xa Xikwembu. Hi swona hinkwaswo leswi Xikwembu xi swi lavaka, a kuri gandzelo lero ro hisiwa na ku tivula swidyoho. Nakona Yobo u swi endlile swilo leswi.

<sup>58</sup> Kutani Sathana a ku, “Ndzi ta teka tikamela ta yena, hikuva a ri xifumi. Ndzi ta teka tinyimpfu ta yena.” Kutani ekuheteleleni a teka vana va yena, lava va nga ekusuhi swinene na mbilu ya yena.

<sup>59</sup> Hambi swi ri tano, Yobo a yima a tiba swifuva, hikuva a switiva leswaku i Xikwembu. Kunene, a ri ntiyiso wa leswaku a Xi ri Xikwembu, hikuva a vulavurile na Xona, nakona u hlangane na swilaveko swa Xona. U lavisisile ni ku kumisisa leswaku, “Ndzi endlile magandzelo hinkwawo yo hisa. Ndzi ku embilwini ya mina, ‘Nkarhi wun’wana loko majaha ya mina ya—ya endla nkhuvu, nakona tintombhi ta mina ti vile kona, kumbexana va nga hava va dyohwele exihundleni etimbilwini ta vona, swingaleswi ndzi ta va nyikela hi gandzelo ro hisa eka swihoxo leswi va nga swi endla.”

<sup>60</sup> Wena Xikwembu! Loko vanhu va hlayisa leswi Xikwembu xi nga swivula leswaku va swi endla, u na ntiyiso wa leswaku hi Xona Xikwembu, Xi fanele ku hlamlula. Ripfumelo ri Xi vitana eka xivono, nkarhi hinkwawo.

<sup>61</sup> Loko u endlile leswi u swi tivaka leswaku swi ntiyiso, loko u tava u hlanganile na swilaveko swa Xona, loko u tava u tivurile swidyo ho u tlhela u swi lulamisa, kutani u tlherisela, u swi veka emahlweni ka Xikwembu. A ndzi na mhaka ni leswaku Xi miyerise ku yini, Xa ha ri Xikwembu, xi rindzele ku vekela ripfumelo lero kwalahaya. U endlile mintirho ya wena, sweswi Xi lava ku vona ripfumelo ra wena hi mintirho ya wena. Xi lava ku vona leswi u nga ta swi endla.

<sup>62</sup> Loko u ri na ntoto u tlhela u khongeleriwa, Xikwembu xi rindzerile ku vona leswi u nga ta swi pfumela ha swona. Ku ngari ku tsutsuma hi Sonto lowu wu taka, na ku tsutsuma hi siku leri ri tlhandlamaka, kutani muhanyisi loyi a landzelaka a fika edorobeni. U rindzerile ku vona leswi u nga ta swi endla hi ripfumelo ra wena. Ku ngari ku tlhelela endzhaku, hi siku leri ri landzelaka, kutani i ku, “A ndzi titwi kahle, a ndzo vhumbha ndzi horisiwile.” A wu ringanelanga hi layini ya xikhongelo, ndhawu yo sungula. A wu tano. A wu tano. A wu tilulamiselanga, hambi swi ri tano. A wu pfumeli leswaku hi Xona Xikwembu. A ndzi . . .

<sup>63</sup> Mi nga ha vula leswaku, “Makwerhu Branham, a ndzi yimi na wena.” Swendlo swa wena swi kombisa leswi u nga xiswona. “Hi mihadzu ya vona mi ta va tiva.” Loko munhu a vula leswaku hi yena Mukreste; nakona a ha nwa, na ku zaha, na ku beja swo beja, na ku vula mafenya yo thyaka, i ku, “Xiphemu xin’wana xa Bibele xi kahle, leswin’wana a swi kahle.” A nga ha chumayela Evhangeli, na ku ala xiphemu xin’wana xa Bibele. Wa ha ri mudyohi. A nga kahle, hambi swi ri tano.

<sup>64</sup> Kambe loko u tivula erivaleni leswaku Xikwembu xa ha ri Xikwembu xin’we, nakona vutomi bya wena byi laveka emavokweni ya Xona, kuva leswaku, “Hosi, ndzi vumba; Wena u Muvumbi,” kutani kombelani leswi mi swi lavaka. Ripfumelo ri ngaka ri nga tsekatseki. Ri ta yima kwalahaya.

<sup>65</sup> Hambi loko swiyimo swi tikomba swi wa kusuka exineneni nale ximatsini, kambe ripfumelo lero a ri kali ri tsekatseka, hikuva u na ntiyiso wa leswaku hi Xona Xikwembu. Nakona loko Xi ri Xikwembu, Xi hlayisa xitshembhiso xa Xona. Xi ngaka xi nga endli xitshembhiso xi tlhela xi xi tshova. Loko Xona xi ri Xikwembu, Xi fanele ku hlayisa xitshembhiso xa Xona. Oho, ndza swi rhandza sweswo. Xi fanele ku tshama na swona.

<sup>66</sup> Yobo u endlile magandzelo ya yena; u endlile hinkwaswo. A switiva leswaku a lulamile. Kutani lahawani ku ta swirho swa kereke, swin’wana swa tikereke ta tidinominexini

tin'wana, swi ku, "Yobo, swa antswa u tivula leswaku u mudyohi, hikuva Xikwembu a xi nge ku pfumeleli u xupuriwa hi ndlela leyi handle kaloko u ri mudyohi."

<sup>67</sup> Kambe Yobo a ku, "Ndzi tivurile swidyoho swa mina. Ndzi vekerile gandzelo ro hisiwa emahlweni ka Xikwembu, nakona a ndzi mudyohi." A tiva laha a nga yima kona. Kutani hinkwaswo swi yile emahlweni, ntsena kuya emahlweni nale mahlweni nale mahlweni, ntsena hi ku tika tani hilaha swi nga fambisaka xiswona, a ringeta ku yisa Yobo ehansi, nakona ku tisa Yobo endhawini leyi a nga tsan'waka Xikwembu na ku tsan'wa gandzelo ro hisiwa. Hi minete leyi u tekaka goza ehenhleni ka hinkwako loku u nga tivula vudyoho, swi kombisa ku tsana ka wena, kuva u kanakana Xikwembu. U kombela Xikwembu eka hinkwaswo, ni ku famba-famba u ri karhi u xi kanakana, kutani hi wena mukanakani u ngari mupfumeri.

<sup>68</sup> Yobo a tiva laha a nga yima kona, kutani u yime a nga ninginiki eka masungulo ya lawa.

<sup>69</sup> A swi hlamarisi loko Pruitt a te, eka awara ya yena yo fa:

Eka Kreste, Ribye leri ri tiyeke, ndza yima;  
Hinkwayo misava leyin'wana i misava leyi yi  
mbombemelaka.

<sup>70</sup> Ehenhla ka ribye lero tiya ra ku tivula ka Yobo, hambi kuri nsati loyi a nga murhandziwa wa yena a huma a famba. Loko rihanyu ra yena emirini ri fambile, na marhumba lawa a yari eka yena hinkwako, kutani a tin'wayetela a rhuketela siku leri a nga tswariwa hi rona. A ku, "I ngaku dyambu ri nga yima ri nga tlhavi! I ngaku n'weti wu nga tshama ehansi ni vusiku."

Nsati wa yena a ku, "Yobo, a wa ha tsakisi. Hikokwalaho ka yini u nga rhukani Xikwembu xa wena u fa?"

<sup>71</sup> A ku, "U vulavula kukotisa vavasati va swihunguki." A ri na ntiyiso wa leswaku Xikwembu xi kona, nakona a hlanganile na swilaveko. Oho, ndzi twa ndzi kateka. A switiva leswaku u hlanganile na swilaveko swa Xikwembu, nakona sweswo swa swi tshamisekisa. Xikwembu a xi ringeta ripfumelo ra yena. Xi ta ringeta na ra n'wina. Xi ta ringeta na ra mina.

<sup>72</sup> Kambe loko hi hlanganile na swilaveko swa Xona, "Hundzukani un'wana na un'wana wa n'wina kutani mi khuvuriwa hi Vito ra Yesu Kreste leswaku mi rivaleriwa swidyoho, nakona mi ta amukela nyiko yi nga Moya lowo Kwetsima," hi xona xitshembhiso xa Xona xexo. "Loko kuri na un'wana loyi a vabyaka exikarhi ka n'wina, vitanani vakulukumba va kereke. Kutani mi va pfumelela va va tota hi mafurha, kutani va va khongeleta. Xikhongelo xa ripfumelo xi ta hanyisa muvabyi, nakona Xikwembu xi ta va pfuxa." Sweswo swa swi tshamisekisa. "Tivuli milandzu ya wena, un'wana eka un'wana, mi tlhela mi khongezelana." Mi hlanganile na swilaveko swa Xikwembu.

<sup>73</sup> “Masingita lawa ya ta endliya hi lava va pfumelaka. Va ta hlongola madimona hi Vito ra Mina; va ta vulavula hi tindzimi letintshwa; loko va nga khoma tinyoka kumbe ku nwa leswi swi dlayaka, swi ngaka swi nga va vavisi; loko va tlhandleka mavoko eka lava va vabyaka, va ta hola.” Sweswo swa swi tshamisisa.

<sup>74</sup> Va na ntiyiso wa Xikwembu. Vana na ntiyiso, leswaku embilwini ya wena, leswaku wa pfumela leswaku lero i Rito ra Xikwembu. Yobo a ri tano.

Nsati wa yena u teri, “Hikwalaho ka yini u nga Xi rhukani u fa xana? Hikokwalaho ka yini, u ya u nyanya nkarhi hinkwawo.”

<sup>75</sup> Hilaha Sathana a swi rhandzhaka ha kona ku mi hoxa sweswo. “Hikokwalaho ka yini, a wa ha antswi ku fana ni loko wa ha ri na ntoto. A wa ha antswi ku fana ni loko swichumayeri swi tava swi ku khongelerile. Swichumayeri swa kona a swi ngari kahle, endhawini yo sungula.” A swi na mhaka ha muchumayeri ya loye. I ripfumelo ra n’wina eka Xikwembu lexi xi hanyaka, leswi swi hlaiwaka. Ku ngari hi leswi muchumayeri a nga xiswona; hi leswi Xikwembu xi nga xiswona. Muchumayeri a nga endla xitshembhiso; Xikwembu hi xona lexi xi endlaka xitshembhiso. Ku ngari eka muchumayeri; swi le ka Xikwembu, na ripfumelo ra n’wina ro pfumela leswaku xexo i Xikwembu. Swingaleswi vanani ntiyiso wa Xikwembu. Vanani na ntiyiso wa leswaku hi xona Xikwembu, nakona lero i Rito ra Xikwembu. Nakona Xikwembu xi le Ritweni ra Xona.

<sup>76</sup> Kutani Yobo a ku, “U vulavula ku kotisa wansati wa xihunguki.” A ku, “Hosi a yi nyikile, kutani Hosi yi tlhele yi teka; ku katekile Vito ra Hosi.” A ri na ntiyiso wa leswaku ku na Xikwembu.

<sup>77</sup> Kutani loko a tava a humese sweswo hi nomu wa yena, tindlati ti sungurile ku duma na rihat i sungula ku hatima. Xikwembu xi famba-famba eka xivono. Minkarhi hinkwayo ri Xi vitana xi ta eka xivono. Xi tshamile xi miyela nkarhi wo leha.

<sup>78</sup> Sweswo hi leswi Xi swi endlaka. Langutani eka ntlawa lowu wu nga boheriwela tihle wa ma Amerika, vatikukumuxi lava va yaka ekerekeni. A ndzi lo khunguvanyeka. Kambe vudyoho byi khunguvanyisa un’wana na un’wana loyi a nga lulama na Xikwembu. Ku ngari ku khunguvanyeka na tiko, ku ngari ku khunguvanyeka na vanhu, kambe ndzi khunguvanyekela javulosi loyi a va ngaka swilo leswaku swi pfala vanhu mahlo.

<sup>79</sup> Vafundhisi lava va mabofu na swichumayeri va va pfumelela va tiseketela eka maendlelo man’wana mantsongo ma ntivo-vukwembu lebyi byi nga endla hi munhu. U ta fanela ku tswarewa nakambe. Nakona Xikwembu xi hlaysia Rito ra

Xona. Xi n'wi vona tani hiloyi a va miyetaka. Swa antswa u va na ntiyiso wa leswaku Xikwembu xi kona. “Va na nghohe ya vukhongeri, ni ku ala Matimba ya byona.”

<sup>80</sup> Wansati loyi lontsongo, wa xisiwana, a switiva leswaku a Xi ri Xikwembu. Tani hiloko mbita liya yi ya yi vohla, yi vohla, yi vohla, swiyimo swi ye swi nyanya na ku nyanya, nkarhi hinkwawo. Kambe Xikwembu a xi swi pfumelela swi va hi ndlela ya leyo. Ntsena Xo rhanda ku swi endlisa sweswo. Xi rhanda ku veka ripfumelo ra n'wina eka ku ri ringa, ku vona leswaku u tava na maendlelo ya njhani, u nge u va loyi a nga mutotiwa ni kuva u khongeleriwile, kutani xi ku endla leswaku u nyanya. Xi ku, “Tana, Sathana, n'wi ringi. Ndza switiva leswaku u pfumela eka Mina.” A ku kateki Xikwembu hilaha ku nga heriki! Oho, mina! [Makwerhu Branham a phokotela mavoko ya yena ka mbirhi—Muhleri.] “N'wi ringi sweswi. Ndza switiva leswaku u tekile Rito ra Mina ha swona.” Xana Xi nga ha swi vula sweswo eka wena xana?

<sup>81</sup> Xi swi vurile sweswo eka Yobo. Xi ku, “Endla hinkwaswo leswi u swi lavaka ha yena, kambe u nga teki vutomi bya yena, hikuva Ndza switiva leswaku wa Ndzi rhanda. U ndzi hiserile gandzelo. U endlile swilaveko. U endlile leswi Ndzi nga n'wi byela leswaku a swi endla, nakona wa swi pfumela. Sweswi u nga n'wi vumbuluza emakaleni loko u swi lava.” U tekile hinkwaswo leswi a ri na swona. Xikwembu xi swi endle ha ka mbirhi loko Xi n'wi tlheriserile swona. Hakunene, Xi ta swi endla.

<sup>82</sup> Xi veka ripfumelo ra hina leswaku ri ringiwa, ku vona loko hakunene hi pfumela leswaku hi Xona Xikwembu.

<sup>83</sup> Wansati ya loye lontsongo, a swi kanakanisi, a ku, “Ndzi khongerile. Ndzi khongerile. Ndza switiva leswaku ndzi wa Matiko loyi a nga faneriwangiki.”

<sup>84</sup> Tsundzukani, Yesu u vulavurile hi wansati loyi a Bibeleni. A ku, “A ti ngari kona tinoni to tala emasikwini ya Elia xana? Kambe a rhumeriwe eka un’we ntsena, nakona a ri wa Matiko.”

<sup>85</sup> “Oho,” a ku, “Ndza khongela.” Nkarhi wun’wana, loko a tava a vone ximbundhwa nyana xexo lexintsongo, rifu a ri nghanile egedeni kutani ri fika enyangweni. Ku luma kan’we ntsena, xiphemu, kutani yena na jaha ra yena va fa. Ndzi nga ha n'wi vona, vusiku hinkwabyo, a ri eku khongeleni, moywa wa lowo wo hisa wu ri ekubeni, kutani misava a yi bile hi xibakele, kutani vanhu a vari eku rileni ni ku tlhava mukhosi eswitarateni. A rhendzeleka, hi yindlu. A languta xijahetani xa yena. A languta swipijamani swa xona; hinkwawo a va ondzile, kutani swinengani swa xijahetani swi humele ehandle. A languta mavoko ya yena n'winyi, ya vunile. U yile endzhaku nile mahlweni, kambe a ku, “Ndza switiva leswaku Xexo i

Xikwembu. Ndzi tivurile vudyoho bya mina hinkwabyo. Ndzi endlile hinkwaswo leswi Xi swi lavaka. Ndzi kombelela vutomi bya hina, eka ku kwetsima ka Xona.” Xikwembu xi n’wi vonile.

<sup>86</sup> Hinkwavo ka vona a va ya ehandle va ya eku denseni lokukulu kun’wana, va tisasekisa, va ri na nkombiso wa ximanguva lawa wa thelevhixini kumbe swin’wana, va ya emahlweni na misava. Kambe wansati ya loye a ri yexe na Xikwembu.

<sup>87</sup> Hiloko rixa. A ku, “Nakulorhi lontsongo u ririle vusiku hinkwabyo a rilela swakudya. Xana ndzi nga endla yini hi mapa lawa ya tataka xandla ntsena?”

<sup>88</sup> Ma swi tiva, mapa ya lawa akuri Kreste. Xichudeni xin’wana na xin’wana xa Bibele xa switiva leswaku Kreste a ri ku nyikela ka Swakudya. Nakona ku nyikela kwaloko ka swakudya a ku fanele kuva ehansi na rikoko, na rona, ku fikela laha ri tsemelelaka xiphemu xin’wana na xin’wana xa vele ku fana; hikuva Yesu Kreste wa ha ri yena wa tolo, namunlhia, ni hilaha ku nga heriki. Nakona mupfumeri un’wana na un’wana wa swi pfumela sweswo ni ku wisela eka swona. Haleluya! U nga hava na byona bya khale hinkwabyo, vukhongeri byo titimela bya ximfumo lebyi mi byi lavaka. Eka mina, ndzi pfumela leswaku Kreste wa ha ri yena wa tolo, namunlhia, ni hilaha ku nga heriki. Ndzi endla ku yima ka mina emisaveni ya vagwinihi. Ndza ha pfumela leswaku hi Yena wa tolo, namunlhia, ni hilaha ku nga heriki.

<sup>89</sup> Makoko ya vona ya tsemelerile xiphemu xin’wana na xin’wana xa xona ku fana, hikuva xa ha ri Xona. Xa ha ri Xona Xikwembu xin’we lexi a Xi ri kona, Xi kona sweswi, mixo lowu. Minkarhi hinkwayo Xi tava lexi xi fanaka. Sweswo hi leswi mapa ya vulaka swona.

<sup>90</sup> Nakona mafurha swivula Moya, tani hilaha hi switivaka kuya hi Ezekiel 4, na kuya emahlweni. Hi xona xivangelo xa kuva hi tota hi mafurha; i Moya. I yini xana? Tani hi Mukwetsimi Yohana 4, “Tatana u lava vona lava va nga ta N’wi gandzela hi Moya na Ntiyiso.” Yesu a ri Ntiyiso. A ri ku nyikela ka gandzelo ra Swakudya, nakona mafurha lawa a kuri Moya. Nakona Moya, swi hlanganisiwa na Ntiyiso, a fanele ku tisa swin’wana. A swi veka kun’we, swi endla ximbundhwa. Oho!

<sup>91</sup> Ri kwihi ripfumelo ra n’wina xana? Loko Rito ra Xikwembu ri chumayeriwile hi ku olova ka Rona, hambi leswi ri nga eka Matimba ya Rona, leswaku Yesu Kreste wa ha ri yena wa tolo, namunlhia, ni hilaha ku nga heriki, nakona Rito ri ya emahlweni eka Mapa, u na Mafurha lawa u nga ta ma hlanganisa na Wona. Ma nga hava ntsena ma tata nyana xandla, kumbe lepula leri ri nga tala, kambe, hambi leswi swi nga vaka xiswona, swa hanya.

<sup>92</sup> Sweswi swi ti lulamiseli yini? Swi tilulamiserile xihambano. Swi tilulamiserile gandzelo leri ri nga rona hi roxe. Sweswo hi leswi mi faneleke ku swi endla. Loko Rito ri chumayeriwile, nakona mi ri na Moya nakona Ma hlanganisiwa kun'we, i gandzelo leri ri nga rona hi roxe ku alela xitlhavi xihi kumbe xihi, ku alela vuvabyi hinkwabyo, ku alela hinkwaswo leswi swi hambanaka na Rito ra Xikwembu, ni ku ri yimela.

<sup>93</sup> Dokodela u vula *leswi, sweswo*, kumbe *swin'wana*; u nga kali u endla ku hambana. U yima eka Rona, hikuva Xikwembu xi vule tano. Mapa ya ta. U va na Mafurha. U Swi hlanganisa kun'we.

<sup>94</sup> Sweswi, ndzi twa rito. Ri swi tsongo nyana endzhaku kaloko rixile. Rito ri vulavula, ri ku, "Famba erivaleni u ya teka tihunyi timbirhi." Mi kale mi swi xiyisisa, Matsalwa ya teri "tihunyi timbirhi"? Xihambano. A ri na mapa na mafurha, kambe u ta vitaniwa, ku ta kombisa sweswi; ku kombisa na swona. Hambi u khome ku fika kwihi, Mapa man'wana yo tala kumbe Mafurha man'wani tani hiloko u ma lava, kambe u fanele ku kombisa; gandzelo rona hi roxe.

<sup>95</sup> Tihunyi timbirhi. Eminkarhini ya khale a va kalanga va kuma ndlela yo antswa yo endla ndzilo. Loko u teka rihunyi u ri hingakanya na rihunyi lerin'wana, u layita exikarhi, u hlanganyeta ha timbirhi emakun'wini. Makula ma tshivela ndzilo wa vona. Ndzi wu tshiverile, minkarhi yo tala, vusiku hinkwabyo. Ntsena ndzi teka tsanda, kutani ndzi wu veka hi ndlela *leyi*, kutani wun'wana hi ndlela *liya*, kutani ntsena ndzi tshamela ro hlanganyeta endzilweni loko ya ha pfurha.

<sup>96</sup> Rihunyi lero a kuri xihambano. "Tihunyi timbirhi," Bibele yi vula tano. Rito ri teri, "Famba erivaleni ra muti u ya rhotela tihunyi timbirhi." Hi nkarhi wa lowo, ehenhleni ka ntshava, a kuri na rito leri a ri duma eka muprefeta kutani ri ku, "Famba emutini. Ndzi lerisile." Oho, mina! Havumbirhi bya vona va yingiserile. Swin'wana swi lava ku humelela. Havumbirhi bya vona va yingiserile.

<sup>97</sup> Loko muchumayeri a chumayela Rito, na munhu loyi a Ri pfumelaka a Ri pfumela a tlhela a tirha ehenhleni ka Rona, swin'wana swi fanele ku humelela. Loko u ri mudyohi, u ta fanela kuva u ponisiwa. Loko u vabya, u ta fanela ku hanyisiwa, hikuva Xikwembu xi swi tshembisile, loko hi ri ntiyiso wa Xikwembu.

<sup>98</sup> Tani hi ntiyiso tani hiloko Xi ri Xikwembu, Xi fanela ku hlaysia Rito ra Xona. Hakunene! Kutani ku lerisa a kuri leswaku, "Yana emutini, hikuva Ndzi lerisile wansati wa noni." Xivono xi humelela emahlweni ka muprefeta. Lahawani wa ta, a ri karhi a famba. A nga ku tivi laha a ya kona; a swi kali swi endla ku hambana. Ntsena a yingisela.

<sup>99</sup> A nga switivi leswaku tihunyi leti ti tava ti ri kwihi, kambe ti kona tihunyi timbirhi erivaleni ra muti kun'wana. U sungurile.

A ya ehandle erivaleni ra muti. A fika a lava-lava, “Oho, a ku hisa njhani!” Ku tlhava ka mukhosí loku a ku ta ku huma hi le tikweni, swigida-vusiku swi ta swi nghena kwalahaya, swi ri karhi swi dedeleka, swi ri karhi swi nwa tiwayeni ta swona, na kuya emahlwени. A languta ehansi exitarateni. A nga voni nchumu. A kuma rihunyi rin’we; xiphemu xa xihambano, gandzelo hi roxe. A kuma xiphizana xin’wana, xa rihunyi. Kutani loko a tava a rhwalerile rihunyi ra vumbirhi . . .

<sup>100</sup> Oho, ku nga hava kuri na munyama wa njhani, rifu ri ri enyangwени. Yena na jaha ra yena a va fanele ku dya xiphemu xintsongo xa ximbundhwa kutani va fa. Sweswo a kuri ku helela ka swona hinkwaswo. Nakona minkarhi yin’wana, kona exikarhini ka munyama, hilaha hi twaka rito.

<sup>101</sup> Loko a tava a rhwalerile rihunyi lero ra vumbirhi a sungula ku tlhela, a kuri na rito leri a ri ta hile gedeni, ri ku, “Ndzi kumeli mati nyana hi xibye.”

<sup>102</sup> U hundzulukile leswaku a languta, na tihunyi timbirhi evokweni ra yena, na mapa na mafurha swi nga hlanganiserwa kun’we nakona swi va swilulamile. U teri u swilulamisile, a swi hlanganisela kun’we. Sweswo hi leswi, Rito na Moya, swi fanele ku hlanganisiwa kun’we. A tlhandleka ehenhla ka gandzelo ra xihambano xa gandzelo ra swona n’winyi, ku alana na nchumu wun’wana na wun’wana eka lowu u nga wu kombela. Hi swona sweswo. “Ndza swi hlanganisela, sweswi ndzi ya kuma tihunyi leti.”

Nakona rito lero ri teri, “Ndzi keli swimatana ndzi nwa, hi xibye.”

<sup>103</sup> U langutile, kutani a vona munhu a yimile, a khegetele gede, wa xilebvü xo lala, wa malebvü, wa mpandla, a langutile egedeni, a ri na xiphemu nyana xa zovo ra nyimpfu a nga tiphutsela hi rona. A languteka tani hiloko a ri muxaka wun’wana wo languteka ku kotisa njhingga ya khale.

<sup>104</sup> A ku, “Ndzi ta avelana na yena mati.” Mamati ya Vutomi, a tsakelaka ku ma nyika un’wana na un’wana, ku byela un’wana na un’wana, ku ya kun’wana na kun’wana. “Ntsena yima nyana, nkulukumba.” U sungurile endzhaku, na tihunyi leti a tiri evokweni ra yena.

<sup>105</sup> Kutani rito ri ta riduma nakambe, “Ku ngari ntsena leswaku hi avelana mati, kambe ndzi nyike xiphemu nyana xintsongo xa vuswa lebyi byi nga evokweni ra wena.” Vuswa bya vutomi; mati ya vutomi! A kuri ya vutomi xana? A ta fa ku ngari khale tani hiloko ya lawa ya hela. “Ndzi kele mati u tlhela u ndzi nyika vuswa.”

<sup>106</sup> Xana hi kuma yini lahawani? I dyondzo yihi leyi hi nga yi kumaka xana? “Rhanganí hi ku lava Mfumo wa Xikwembu kusungula, ni ku lulama ka Xona hinkwako; swilo leswin’wana swi ta engeteleriwa.”

“Ndzi keli swimatana na xiphemu nyana xa vuswa.”

<sup>107</sup> Hiloko a hundzuluka, eka munyama wa yena. Ndzi nga ha n’wi twa loko a ku, “Nkulukumba,” swin’wana swo kotisa leswi, “u hambanile ni vavanuna lava ndzi nga tshama ndzi va vona, ni vavanuna lava ndzi nga tshama ndzi va twa va vulavula. U tikomba u yima na leswi u swi vulaka. Kambe ntsena ndzo va na mapa lawa ya ringaneleke, ntsena lawa ya tataka xandla, na mafurha lawa ya tataka lepula. Ndzi swi lulamisile, nakona ndzi ya eku byi swekeni hi tihunyi leti ti mbirhi. Nakona ndzi ya eku byi dyeni, mina na jaha ra mina, kutani hi fa. Hi swona hinkwaswo ndzi nga na swona.”

<sup>108</sup> Leswi hi switwaka, kutani, kuta leswi swi landzelaka? “Kambe, ndzi kumeli nyana ximbhundwa, ku sungula.” Xikwembu, ku sungula. Swi nga khathaleki leswaku un’wana u ri yini, swin’wana na swin’wana, vumbhoni byihi, byi languteka byi ri na munyama wihi, hambi ku ngava yini, tekanii Xikwembu, ku sungula. Rito ra Xona, ku sungula.

<sup>109</sup> “Dokodela u teri a ndzi nge holi.” Kambe, Rito ra Xona, ku sungula. “Ndzi mudyohi ngopfu. Ndzi ngwavavani. Ndzi mubindzurisi. Ndzi xidakwa.”

Rito ra Xikwembu, ku sungula. “Hambi loko swidyoho swa n’wina swi nga kotisa mavala yo tshwuka, swi ta basa ku kotisa gamboko; swi tshwukile ku kotisa vala ro tshwuka, swi ta basa ku kotisa wulu.” Xikwembu, ku sungula.

<sup>110</sup> “Famba, u ya ndzi tekela ximbhundwa nyana, ku sungula. Hinkwaswo leswi u nga na swona, swi tise eka mina.” Xana wa swi tsakela ku xi nyika emavokweni ya Xona ke?

<sup>111</sup> Vutomi bya mina, hinkwaswo leswi ndzi nga xiswona. Ndzi na makume ntlhanu wa malembe hi vukhale. “Wa swi navela, William Branham, ku byi vekela eka Mina xana? Wa swi navela, n’wina vana lava ntsongo, ku vekela vutomi bya n’wina eka Mina? Ma swi navela? Xana mi nga swi endla, vanhu lava va vabyaka? Xana mi nga Ndzi tshembha? Rhangisani Mina kusungula.”

<sup>112</sup> “Tisa xiphemu nyana xa vuswa lexi xi nga evokweni ra wena, u tlhela u ya ndzi kela swimatana.” U n’wi langutile. A kuri na swin’wana leswi swi nga n’wi byela leswaku munhu ya loye u tiva leswi a swi vulavulaka.

Xikwembu xi tiva tinyimpfu leti ti nga ta Xona N’winyi. “Tinyimpfu ta Mina ti tiva Rito ra Mina. Ta switiva loko kuri Matsalwa kumbe ku ngari wona, hambi hi swona kumbe a hi swona.”

<sup>113</sup> Wansati u hundzulukile, hi ku yingisela. Sweswo hi leswi mi fanelaka ku swi endla. Kutani loko a tava a hundzulukile, ku yingisela leswi muprofeta a nge endla, kutani ku tile ku pfuma loku ku humaka eTilweni, leswaku

munhu un'wana na un'wana a languta a ta yingisela. Hikuva, lahaya ku tile ku pfuma loku ku humaka eka rito ra muprefeta, leswaku mudyohi un'wana na un'wana na munhu un'wana na un'wana na loyi a vabyaka u navela ku yingisela, "LESWI HOSI YI SWI VULAKA."

<sup>114</sup> Hilaha hi nga navela hakona ku Ri twa! Hilaha vanhu va nga ndzi tshamela hakona endleleni leyi ndzi chayelaka eka yona, ri ku, "Tana eka nyangwa lowu. Nhwana wa mina u le ka *wona*. N'wana wa mina, mina, wa ha ri lontsongo ngopfu. Ntsena vula rito." U nga ri vula njhani ri nga si va enon'wini wa wena? U tava u ri karhi u swivula hi wexe. Kambe a va navela ku swi yingisela sweswo, "LESWI HOSI YI SWI VULAKA."

<sup>115</sup> Lahaya ri ta, hi ku tsemekanya fense, hikuva a ri eku yingiseleni. Kutani munyama wu hangalaka. "LESWI HOSI YI SWI VULAKA. Mbita a yi nge he heli, hambi kuri exikhutwini a xi nga ha omi, ku fikela laha siku ra Hosi Xikwembu xi rhumelaka mpfula emisaveni." Oho, i ku tichavelela ka njhani!

<sup>116</sup> U bakile ximbhundhwa. A xi nyika muprefeta. A tlhela a ya bakela n'wana wa yena na yena n'winyi. Nakona va dyile va nwa, hi vunyingi bya swona, ehenhleni ka misava.

<sup>117</sup> Xana a ma huma kwihi? Xana ma fike njhani kwalahaya? Hi xisayense ndzi byeleni leswaku mapa ya lawa a ya ta ya huma kwihi. Xana mafurha ya lawa a ya huma kwihi? Ma nghene njhani exikhutwini xexo? A chulula ku sala ku omile, mixo wun'wana na wun'wana. A chulula mapa embiteni, mixo wun'wana na wun'wana, nakona a ku omile. Kambe loko a tlhelela nakambe ku ya kuma man'wana, a ya ri kona. Xana a ma huma kwihi? Tekani Xikwembu eRitweni ra Xona. Va na ntiyiso wa Xikwembu. Hi Xona Mutumbuluxi.

<sup>118</sup> Mi nga hava mi lahlekeriwe hi rihanyu ra n'wina ra le mirini. Mi nga hava mi lahlekeriwe hi xinakulobye. Xi tekeni eRitweni ra Xona. Mi va ntiyiso wa leswaku hi Xona Xikwembu. Minkarhi ya munyama leyi hi yi vonaka sweswi, yi ngaka yi nga languteki yi ri munyama loko ntsena mi xi teka eRitweni ra Xona nakona mi va ntiyiso wa leswaku hi Xona Xikwembu.

<sup>119</sup> E Germany, kan'we, ndzi vonile xifaniso, nakona ndzi tshama ndzi ri na xona minkarhi hinkwayo. Mupfapfarhuti wa mu German u pendile...xifaniso lexi—lexi xivitaniwaka "The Cloud Land." Kutani loko u xi vona, xi ri ekule, i munyama lowu wu chavisaka ngopfu lowu u nga se tshamaka u wu vona. Ntsena mapapa lawa ya nga khomana kun'we, loko u xi languta u ri eka mpfhuka wo leha. Kambe loko u xi tshunelela swinene, xa ncinka. Timpapa ta xona ta Tintsumi tiva ti ri karhi tibana, ti ri karhi ti yimbelela haleluya Hosi. Swingaleswi kwalaho hilaha ku nga na munyama nkarhi wun'wana. Loko

u xi languta, u ri eka mpfhuka wo leha, xi languteka xi ri na munyama xi tlhela xi zwi hala. Kambe teka Xikwembu eRitweni ra Xona nakona wena u va ntiyiso wa leswaku hi Xona Xikwembu, nakona u famba u xi tshunelela, u ta kuma leswaku kova timpapa ta Tintsumi leti ti bananaka kun'we.

<sup>120</sup> A ri hi ndlela leyi Abraham a ri xiswona, a vitana ku nyika hinkwaswo leswi a ri na swona, a swi tlhandleka ehenhla ka altari ya gandzelo. Nkarhi wun'wana u vitanisiwe xisweswo, mixo lowu. Tshika tindlela ta wena. Tshika ku ka u nga pfumeli. Tshika hinkwaswo leswi u nga na swona. Kutani u teka Mafurha na Rito, u Swi hlanganisa kun'we, u Swi tlhandleka eka altari ya gandzelo leri ku nga wena. U ta kumisia, Ri ta vitana Xikwembu xi vonakala eka xivono, tani hiloko hi ntiyiso ndzi yimile eka phulphiti leyi.

Ehleketa ha swona loko ha ha khongela.

<sup>121</sup> Xana u na xilaveko namuntlha? Xana u na xilaveko lexi xi tlulaka leswi u nga swi kumaka hi xinyama? U na mali ya le hansi ngopfu leyi u nga hlulekaka ku hakela rhente xana? Xana vana va lava tintanghu letintshwa, nakona u hava mali yo ti xava? Xana mbita a ya ha ri na nchumu ekaya ra wena, nale xikhutwini ku omile? A wu nge he swikoti ku xava swakudya swa wena? Nakona, kwalahaya, swin'wana swi hoxekile? Tsundzukani, Xi endlile xitsembhiso.

<sup>122</sup> Wa vabya xana, nakona dokodela u vule leswaku u lava vuhandzuri? U hava mali yo swi endla? U na xilaveko.

<sup>123</sup> U mudyohi xana? Xana xilaveko xa wena hi lexikulu, u ri karhi u switiva leswaku hambiloko Xikwembu xi nga vitana, namuntlha, u tava u lahlekile? Xana u tlhelela endzhaku u suka eka Xikwembu? Nakona wa switiva leswaku u nghena kereke yin'wana, kambe wa switiva leswaku a wu kahle? Ripfalo ra wena ra ku byela, ku ya hi Rito, leswaku a wu kahle. Nakona u na xilaveko. U nga pfumeleli marito lawa ya wena ya wela emisaveni ya mitwa, kumbe emaribyeni, timbilu ta maribye. Leswaku ma nga ha wela eka ya kahle, misava yo nona.

<sup>124</sup> Loko u vabya nakona u... dokodela a ku byerile leswaku a wu nge holi, nakona u tsembhisile Xikwembu leswaku u ta Xi tirhela hi masiku hinkwawo ya ku hanya ka wena, nakona u ri na ntiyiso wa leswaku hi Xona Xikwembu, tana u ta hlangana na xilaveko xa Xona. Loko u ri na xilaveko, u nga sungula hi ku yimisa voko ra wena u yimisela Xikwembu, leswaku u na xilaveko xa swin'wana? Xikwembu a xi mi katekisi.

A hi khongeleni.

<sup>125</sup> Wena Hosi, ntsena tani hi ntiyiso tani hi leswi ndzi nga xiswona eka phulphiti leyi mixo lowu, ndza switiva leswaku

a ku ngevi na un'we eka lava mavoko ya nga yimisiwa handle kaloko Wena u switiva, hikuva Wena u Xikwembu. U teri, "A hi swindzingiri swotala leswi swi nga xavisiwa hi tifayideni timbirhi xana? Swi ngava njhani eka wena u tlulaka xindzingiri!" I ka ngani U vona mavoko ya swivumbiwa leswi swi bolaka, laha N'wana wa Wena Yesu a nga fela swona! I ka ngani U vona mavoko ya vona kutlula loko U vona xindzingiri, loko xi nga wa mixo lowu! Ndzi fanerile eka...dozene wa swindzingiri, leswi u nga tako u nga swi xavisi na hi peni mixo lowu, hikuva ku hava loyi a swi lavaka. Nakona ku tava na khombo ro swilahla. Kambe U tiva xin'wana na xin'wana xa swona; U tiva risiva rin'wana na rin'wana leri ri nga emirini wa swona. U tiva na nsisi wun'wana na wun'wana lowu wu nga etinhlokweni ta hina.

<sup>126</sup> Wena Hosi, hlamula xikhongelo. Va pfumeleli va va ntiyiso, mixo lowu, wa leswaku U Xikwembu, nakona hi Wona Moya wa Wena. Leswaku ku rhomba na munyama wa vukhongeri lebyi bya siku leri ra ximanguva lawa ku nga ha wela ekule na vona, va ku, "Oho, ndzi nghena kereke yin'wana ya *swingereengere*. Xikwembu, leswaku sweswo swi nga ha nyamalala eka miehleketo ya vona, sweswi. Eka xinkadyana lexi, leswaku va nga ha khoma ku vonakala ka Vutomi lebyi nga Heriki. Nakona va ta lava ni kuva na torha ra Byona, ra ku tiva leswaku Xikwembu i mani, nakona va ntuyiso wa leswaku hi Xona. Xi hlayisa Rito ra Xona.

<sup>127</sup> Eka mudyohi, leswaku va nga ha hundzuka hi xihatla, va tilulamisela nkhuvulo hi Vito ra Yesu Kreste. Nakona U tshembhisile leswaku U ta va nyika Moya lowo Kwetsima. U swi vurile, Hosi. U hlayisa xitshembhiso xa Wena.

<sup>128</sup> Ku na loyi a nga tlhelela endzhaku loyi a nga tiyisa leswaku Wena u Xikwembu, nakona va huhurile. I ngaku va nga ha ta namunthla, hikuva U teri, "Hambi loko swidyo swa n'wina swi tshwukile, swi ta basisiwa ku kotisa gamboko. Swi tshwukile ku kotisa mavala yo tshwuka, swi ta basisiwa ku kotisa wulu."

<sup>129</sup> Nakona loko kuri na lava va vabyaka, leswaku va nga ha switekela enhlokweni leswaku U Xikwembu. U hlayisa Rito ra Wena. Wa boheka ku hlayisa Rito ra Wena. Tani hiloko va ha ti tisa hi voxé, na Mafurha ya vona, Moya lowu wu nga eka vona lowu wu tivulaka leswaku va pfumela. Nakona, nakambe, na Rito, ku nga Vuswa bya Vutomi lebyi byi ngaya emahlweni, ku nga Kreste; u byi hlengeletele vona, eka Testamente ya Khale; nale ka Testamente leyi Ntshwa, ku kombisa leswaku hi Xona xa tolo, namuntla, ni hilaha ku nga heriki. Leswaku va nga ha hlanganisela Rito na Mafurha, Moya, lowu va nga na wona, kutani va yima hi milenge ya vona ealtarini, va ku, "Leswi hi swona hinkwaswo ndzi nga na swona, Hosi. Ndza swi tisa."

Oh, hilaha U nga ta engetela hakona! Hilaha swi nga ta vitana Xikwembu xa matimu eka xivono xexo! Hilaha swi nga ta pfuxa Yehovha hakona, na ku rhukubya ka mbilu, leswaku, “Ndzi na n’wana loyi a Ndzi yingisaka. Ndzi n’wi ringile, nakona wa khorwisa leswaku wa Ndzi rhandza ni ku Ndzi pfumela. U ntiyiso wa leswi Ndzi nga xiswona.” Hikuva swi vuriwile leswaku, “Loyi a taka eka Xikwembu u boheka ku pfumela leswaku hi Xona, nakona i vahakeriwa va lava va Xi lavaka.” Hi nyike swona, eka awara leyi, tani hiloko hi swi tisa eka Wena.

<sup>130</sup> Kutani, sweswi, loko ha ha korhamisile tinhloko ta hina. Kutani ni lava va nga na xilaveko xa swin’wana, mi nga yima hi milenge ya n’wina, lava va lavaka ndhawu... Sweswi, loko u ngari ntiyiso wena wa leswaku hi Xona Xikwembu... Loko u ri ntiyiso wa leswaku hi Xona Xikwembu, u taya u ya hlayisa xitshembhiso xa Xona, ku ponisiwa, ku hanyisiwa, hambi ku ngava yini, loko u ri ntiyiso wa leswaku hi Xona Xikwembu, yima hi milenge ya wena. Loko u ri na un’wana loyi u lavaka ku n’wi khongeleta, yima hi milenge ya wena. Loko u ri—u ri ntiyiso wa leswaku hi Xona Xikwembu, endla leswaku xikombelo xa wena xi tiveka eka tinhlengeletano ta vakwetsimi. U swi endla tani hiloko u yima hi...[Xivati lexi nga riki na nchumu eka thepi—Muhleri.]

“Ndzi ntiyiso wa leswaku hi Xona Xikwembu. Ndzi pfumela leswaku Xi hlayisa Rito ra Xona. Nakona ndzi na ntuyiso wa leswaku xikombelo xa mina... Ndzi ta xi veka ehansi ka Ngati, kona sweswi.” Loko u endla sweswo, u vekela vudyoho byin’wana na byin’wana. Vudyoho byin’wana na byin’wana i ku ka u nga pfumeli. U nga hava u ri xirho xa kereke, kambe ndzi vula vudyoho, “ku ka u nga pfumeli” ka wena. U ku veka ehansi tani hi gandzelo. U ku endla gandzelo. U ta exihambanweni. U ya egandzelweni, sweswi, hinkwako ku ka u nga pfumeli ka wena. Kutani ku nyike eka Xona, nakona u switiva leswaku hi Xona, nakona u ri ntuyiso wa leswaku Xi ta hlamula. Loko u ri xisweswo, yimisa voko ra wena. U va hi ndlela ya leyo.

<sup>131</sup> Hosi, Wena Xikwembu. Hi lawa Mafurha na Mavele ya vona, swi hlanganisiwe kun’we. Va Swi tisa exihambanweni, laha Ndzilo wa Xikwembu wu nga ta wela etimbilwini ta vona (loko hi leswaku va vula swona hakunene) na ku herisa gandzelo lero. U ta famba-famba eka xivono, pfuxa mati lawa ya nga tumbela. U ta u huma eTilweni, hi golonyi ya Ndzilo. U ta ninginisa matilo hinkwawo na misava, ku va hakela.

<sup>132</sup> Loko va ha yima ni ku yimisela mavoko ya vona ehenhla emoyeni, va ri karhi va kombisa leswaku va pfumela, nakona va ti vekile vona hi voxé, na xilaveko

xihi kumbe xihi va nga xikhoma, kona ealtareni ya Wena. Wena Xikwembu xa Tilo ni misava, Muavanyisi wa Matilo ni misava, hakunene Muavanyisi wa Matilo na misava u ta tisa leswi swi nga lulama. Hakunene Xi ta hlayisa Rito ra Xona, Wena Loyi u tivaka timbilu ta vavanuna, timbilu ta vavasati, timbilu ta vanhu lava.

<sup>133</sup> Hosi Xikwembu, ndzi tlhandleka mavoko lawa ya nga ya mina ehenhla, hikuva ndza switiva leswaku ndzi na ku ncinka eka ministri wa mina sweswi. Nakona ndza pfumela leswaku U kona. Ndzi ku vonile U yimile halahaya hi Langavi ra Ndzilo. [Makwerhu Branham a gongondza ka nharhu a philphitini—Muhleri.] Ndzi ku vonile U kambisisa timbilu ta vanhu. Ku hava na kan'we laha U nga hluleka. U swi tshembhisile loko U ta swi endla halahaya, ku tsemekanya xitarata lahawani, loko u tava U sungurile ku swi endla swilo leswi. Nakona U ndzi rhendzerile ku rhendzeleka hi misava, nakona ku rhendzeleka na ku rhendzeleka. Ndzi tiyisisa leswaku U Xikwembu. Ndzi na nttyiso wa swona sweswo.

<sup>134</sup> Ndza ti nyiketa hi vumina na vanhu lava, na gandzelo hinkwaro leri ndzi nga na rona, Hosi, eka Wena, eka ntirho. Ndza sungula nakambe, Hosi, ku famba ku rhendzeleka hi misava. Ndzi pfune, Wena Xikwembu. Loko ndzi nga Ku pfumelanga nkarhi wun'wana, ndzi rivaleli swidyoho swa mina. Ndzi rivaleli ku ka ndzi nga pfumeli ka mina. Ndza switiva leswaku U kona, ni kuva muhakeri wa lava va Ku lavaka.

<sup>135</sup> Tani hi sweswo, ndzi vula swidyoho swa vanhu va mina, mixo lowu, ku tsana ka vona na ku kanakana ka vona, tani hiloko va ha yimile na mavoko ya vona lawa ya nga emoyeni. Ndzi vula swidyoho swa vona, Hosi, ni vubihi hinkwabyo bya hina. Hi rhumele Moya lowo Kwetsima ehenhleni ka hina, na xilemo xa ku ponisiwa hi Wena, xa leswaku hi Wena Xikwembu. Nakona U kona lahawani ku ta hi amukela, ni kuva u hi teka U hi vukarha, ni ku hi kutsolela hinkwaswo leswi hi nga swi lahla. Loko kuri rihanyu ra hina, leswaku ri nga ha tlheriseriwela eka dzana ra xivala. Loko hi leswaku i moya wa hina, leswaku wu nga ha ta eka hina tani hi atikili leyi yi blomaka, yo hatima, yi tatiwile hi Moya lowo Kwetsima, kuva yi tisiwa emahlweni ka Xikwembu. Loko kuri ku ka ku nga pfumeli ka hina, leswaku ku nga ha ta eka hina nakambe, Hosi, na ripfumelo leri ri susaka tintshava. Hi nyike swona, Hosi.

<sup>136</sup> Hi pfumela leswaku U le ku fambeni, Moya lowo Kwetsima wu le ku nweleleni eka muako lowu, eka vanhu lava, nakona a timbilwini ta vona, ka va fambisa ku ya amukela Xikwembu lexi xi hanyaka. Leswi hi swi endla hi Vito ra Yesu Kreste.

Ripfumelo ra mina ri languta ehenhla eka  
 Wena,  
 Wena Xinyimpfana xa Xihambano,  
 Muponisi wo Kwetsima;  
 Sweswi ndzi yingisi loko ndza ha khongela,  
 Susa swidyo ho swa mina hinkwaswo,  
 U nga ndzi pfumeleri ndzi pepetseka  
 Eka tlhelo ra Wena.

<sup>137</sup> Xana mi vula swona hakunene? Ma swi amukela xana?  
 Yimisani mavoko ya n'wina, mi ku, "Sweswi ndza swi  
 amukela. Ndza pfumela."

Loko vutomi byi va munyama eka nhlangano  
 wa tindlela to tala laha ndzi kandziyaka  
 kona,  
 Kutani nhlomulo lowu wu nga ndzi rhendzela  
 wu hangalaka,  
 A kuve Wena Mufambisi wa mina;  
 Ncinka munyama kuva ku vonakala,  
 Sula maxangu ni ku chava ku ya ekule,  
 U nga ndzi pfumeleli ndzi pepetseka  
 Kusuka eka tlhelo ra Wena.

A hi korhamiseni tinhloko ta hina.

<sup>138</sup> Endzhaku ka rito leri, Hungu leri ri tsemelelaka hi ku  
 tikisela; ro karhata, ni kuva ri humesiwile hi ndlela yo tikisela,  
 kambe ri Ntiyiso. Nakona loko mi titsongahata mi pfumela eka  
 leswi mi nga swi kombela, leswaku mi swi amukerile, mi nga  
 pfumeleli nchumu wu mi susumeta mi suka eka patu lero ro  
 lulama. Yima kwalahaya. Swi ngari na mhaka leswaku ndzi  
 chumayele njhani, hambi ndzi nga endla yini, kumbe hambi  
 munhu wihi kumbe wihi a nga endla yini, wu ngaka wu nga  
 endli nchumu ku fikela laha u wu amukelaka tani hi nhundzu  
 leyi yi nga ya wena n'winyi.

<sup>139</sup> Ma swi pfumela sweswo hi timbilu ta n'wina hinkwato,  
 hinkwaswo leswi u nga na ku navela eka swona. Loko u tivurile  
 swidyo ho swa wena, Xikwembu xi ku rivalerile. U nga ha  
 swikanakani nakambe. Loko u ri loyi a nga tlhelela endzhaku,  
 u tlheriseriwele endzhaku, mixo lowu. Loko u lava Moya lowo  
 Kwetsima, kutani khuvuriwani hi Vito ra Yesu Kreste leswaku  
 mi ta rivaleriwa swidyo ho swa n'wina. Rero i Rito ra Xikwembu.  
 A Xi nga ta Ri twarisa eka kereke, ku ngari eka dinominexini,  
 kumbe ku ngari eka un'wana. Riboheka kuva hi ndlela ya  
 leyo. Hi fanele ku hlangana na swilaveko swa Xona, ku ngari  
 swilaveko swa kereke, swilaveko swa Xona. Sweswo hi leswi hi  
 bohekaka ku swi endla.

<sup>140</sup> Xi teri, "Xikhongelo xa ripfumelo xi ta hanyisa muvabyi."  
 Loko u vabya, ndzi khongerile xikhongelo xa ripfumelo eka  
 n'wina. U xi khongerile embilwini ya wena. U tlhela u xi

pfumela, u xi amukela, u yima u xi bambetela. Xi ta fanelia kuva hi ndlela ya leyo. Ku hava lexi xi nga xi tekaka, swi ngari na mhaka leswaku swi hatimisa ku yini.

<sup>141</sup> U ri, "Kunene, swi nga ha languteka tani hiloko ndza ha vabya." Sweswo a swi tano... Kova ntsena timpapa ta Ntsumi tihlengeletaka kun'we. Hi swona sweswo. I Xikwembu hi xivumbeko xa mikateko. Swi languteka xi ri munyama eka n'wina. Tshunelani nyana eka xona mi ta xi languta nakambe, mi vona loko ku ngari Xikwembu lexi xi nga yima lahaya, xi hlayisaka Rito ra Xona.

<sup>142</sup> Sweswi loko ha ha korhamisile tinhloko ta hina, ndzi ta hundzuluxela xikhongelo eka Makwerhu Neville, mufundhiswa hina.



*VA NA NTIYISO WA XIKWEMBU* TSO59-0125  
(Be Certain Of God)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto na mixo, Sunguti 25, 1959, Taberinakale ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

TSONGA

©2014 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
P.O. Box 178, SOMERSET WEST, 7129 CAPE PROVINCE,  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)